

四庫全書

集部

欽定四庫全書

御定歷代賦彙外集卷五

言志

悼騷賦

陳梁叔敬

彼仲尼之佐魯兮先嚴斷而後弘行雖離讒以鳴邑兮  
卒暴誅於兩觀殷伊尹之協德兮暨太甲而俱寧豈齊  
量其幾微兮徒信己以榮名雖吞刀以奉命兮抉目眦  
於門閭吳荒盟其已殂兮可信顏於王廬圖往鏡來兮

關北在篇名既泯沒兮後辟亦然屈平濯德兮潔顯芬  
香勾踐舉種兮越嗣不長重耳忍推兮六卿卒強趙殞  
鳴犢兮秦人入疆樂毅奔趙兮燕亦是喪武安賜命兮  
昭以不王蒙宗不幸兮長平顛荒范父乞身兮楚項不  
昌何爾生不先後兮惟洪勲以遐邁服荔裳如朱紱兮  
騁變路於奔瀨歷蒼梧之崇丘兮宗虞氏之俊乂臨衆  
瀆之神林兮東勅職於蓬碣祖聖道而垂典兮褒忠孝  
以為珍既匡救而不得兮必殞命而後仁惟賈傳其達

指兮何揚生之欺真彼皇麟之高舉兮熙太清之悠悠  
臨岷川以愴恨兮指丹海以為期

擬騷賦

有序

宋李綱

昔屈原放逐作離騷經正潔耿介情見乎辭然而託物  
喻意未免有譎怪怨懟之言故識者謂體慢於三代而  
風雅於戰國乃雅頌之博徒而詞賦之英傑不其然歟  
予既以愚觸罪久寓謫所因效其體摠思屬文以達區  
區之志取其正潔耿介之義去其譎怪怨懟之言庶幾

不說於聖人目之曰擬騷其辭曰

帝混元之苗裔兮歷漢唐而揚英散枝葉於天壤兮遭  
五季而遯族於甌閩皇祖隱德而弗耀兮逮吾親而振  
名歲昭陽之淵獻兮閏夏甲申吾以降幼倥侗而顓蒙  
兮非岐嶷之夙成長遊學於四方兮爰觀光於國賓服  
詩禮之嚴訓兮傳忠孝之家聲攬百氏之所長兮味六  
經之純精常恐不德以怨及朋友兮慕節義於古人豈  
富貴之足志兮冀斯文之可鳴帶長缺而裁冠兮鏘佩

玉而琚瓊紉蘭蓀之香潔兮服蕙茝之芳馨紛吾既襲  
此衆美兮胡敢自謂之修能誤姓名之上達兮珥史筆  
於彤庭侍穆穆之清光兮聞玉音之丁寧入則陪國論  
於青瑣兮出則扈屬車之清塵惟丘山之恩厚兮何涓  
埃之報輕悼姦邪之亂政兮汨正理而不明竊懷憤而  
鬱結兮每欲叩龍墀而力爭惟本朝之寬大兮非有鼎  
鑊斧鉞之刑何羣公之噤嘿兮咸卷舌而吞聲因積水  
之告災兮爰奏疏而上陳庶一言之悟主兮迴天照之

明明朝抗章而夕貶兮白日不諒予之精誠徒孤忠之  
耿耿兮任萍梗之飄零絕江淮而歷浙兮割深愛於親  
庭陟閩山之險阻兮予隻影之伶俜泛吾舟兮建溪弭  
吾節兮劔浦會計當兮委吏偷燕閑兮篋庫藝蘭蕙兮  
九畹植松竹兮百畝餐秋菊兮落英飲木蘭兮墜露朝  
吾游兮翰墨之林夕吾戲兮圖書之府道既不可以行  
於今兮質聖賢於往古嘉溪山之秀絕兮聊逍遙以容  
與眺翠嶺兮泛清流桂為楫兮蘭為舟有觴詠兮自適

樂天命兮何憂悼屈原之沉汨兮悲賈誼之不修笑退  
之之戚嗟兮憫德裕之窮愁惟君子之出處兮貴體道  
以周流自任以天下之重兮何一己之為謀用則行而  
舍則藏兮又何必殺身而怨尤惟蓋棺兮事始定聊康  
強兮保天性歲寒不失其青青兮惟松柏之獨正信吾  
道以優游兮始居易以俟命亂曰已矣乎莫我知也浮  
雲蔽日兮虹蜺晝明霜露降此芳草兮百鳥寂而無聲  
恐美人之遲暮兮歲道盡而崢嶸側身西望而歎息兮



心鬱結而不平心鬱結兮何為道既不可以散兮斂而  
歸之惟靜惟正兮其殆庶幾吾方將與造物者為遊兮  
又安能蹠咸彭之所遺

反反騷賦

有序

明徐禎卿

昔揚雄作反騷論者多過之予閔原之含忠隕鬱且復  
獲謗遂援筆慷慨賦反反騷辭曰

稽卬氏之攸肇兮繫楚均之遐颺侯帝項之流脣兮承  
靈澤之汪濊風陳力於皇軌兮散仁朗之所廬仄仰吾

均之潔修兮羌引軀以伏羲播昌烈之赫煜兮集衆芳  
之霏霏憤遭世之眊濁兮離紛揚於江之汜在炎漢之  
微季兮孰臨岷而悼均投束藻之欲麗兮何理拙而誹  
深冤志而抑道兮冀披誦而有明惟帝監之孔嚴兮敢  
黨族而誣貞初均幼志於粹清兮乃中情之獨與寥厲  
節以植身兮熹浩蕩之修譽進疊疊於中行兮恐日月  
之凋邁準前修以共蹈兮遑先時而逆敗約性行以赴  
渠兮經五常以綴佩靈修謂其允淑兮目成歡而叶妃

夫均既沐靈修之暉澤兮又信言之嚶嚶苟中路而遷  
好兮寧余心之有介汎光華之的皪兮衆睂睂而妒之  
何有懼讒與招慝兮排蛾眉而錯之颺蕙服之芬郁兮  
遭紛媚而幽毀寧遭幽以迸斥兮敢說汙而合穢鳳凰  
翔林而挂網兮龍行陸而困蟻為鳳凰神龍宜無知兮  
亦處身之多虞所貴賢者之韞玉兮不迷邦而遐舉哀  
宗社之不长兮比于皇皇而不忍去世蔑復以相明兮  
心耿耿以無從涉湘波以南溯兮昭均心之確忠俗叢

蕭而鄣蘭兮實重華之所醜効精白以殞軀兮自先聖  
之所厚奉靈氛之玄筮兮申以巫咸之嘉告覽九州以  
求匹兮寧閨客之有淑測神占其未然兮宜均曾好此  
詭疑諗從人以辱義兮不如赴身於淤泥餐秀芬以介  
齒兮竟河清之難俟違苟生以保譽兮夫何悔於九死  
汎浮雲之翳翳兮晦沉茫其曷排陽陵微而渝度兮晨  
北風又雨霾精徘徊而不去兮憑拙誠其未爽人情重  
於涓故兮焉冀白日之回光懷薜蘿與杜蘅兮時不與

其有芳雜緹拉以颺波兮馥烈烈其彌章精氣通於至  
清兮神髣髴以憑虛駕玉蚪與雲驂兮訪太素之舊廬  
聞至道其可承兮欽均誠之匪懈舍佚遊以自湛兮夫  
何以誅其好怪昔貞士之蒙佞兮憤伏斃而靡悔務光  
沉於淵瀨兮將惡浮埃之霏霽忠賢忉忉以苦身兮蓋  
有隱於隲祚題三仁之所裁兮見歎譽於孔父獨耿耿  
而靚侮兮曾吾均之所尤日印想之惟諛兮駢執正於  
陽侯

自悼賦

漢班婕妤

承祖考之遺德兮何性命之淑靈  
登薄軀於宮闕兮充下陳於後庭  
蒙聖皇之渥惠兮當日月之盛明  
揚光烈之翕赫兮奉殊寵於增城  
既過幸於非位兮竊庶幾乎嘉時  
每寤寐而綦息兮申佩離以自思  
陳女圖以鏡鑒兮顧女史而問詩  
悲晨婦之作戒兮哀褒閭之為郵  
美皇英之女虞兮榮任姒之母周  
雖愚陋之靡及兮敢舍心而忘茲  
歷年歲而悼懼兮閱蕃華之不滋  
痛陽祿與

柘館兮仍襁褓而離災豈妾人之殃咎兮將天命之不  
可求白日忽已移光兮遂晦莫而昧幽猶被覆載之厚  
德兮不廢捐於罪郵奉供養於東宮兮託長信之末流  
共灑埽於帷幄兮永終死以為期願歸骨於山足兮依  
松柏之餘休重曰潛玄宮兮幽以清應門閉兮禁闥局  
華殿塵兮玉階落中庭萋兮綠草生廣室陰兮幃幄暗  
房櫳虛兮風泠泠感帷裳兮發紅羅紛絳繡兮紉素聲  
神眇眇兮密覩處君不御兮誰為榮俯視兮丹墀思君

兮履綦仰視兮雲屋雙涕兮橫流顧左右兮和顏酌羽觴兮銷憂惟人生兮一世忽一過兮若浮已獨享兮高明處生民兮極休勉虞精兮極樂與福祿兮無期綠衣兮白華自古兮有之

自釋賦

宋薛士隆

太歲貞於執徐兮涂月季惟方癸農事畢余揆其成兮  
秋亢陽與襄水飛符命之至紛兮郡府號余曰有敕緡  
泉貨惟四千兮五千杭其以糴越土性而謂余求兮郡



命違其曷可蚤夜民之飼糠粃兮又掇攘之有巨方千  
里而為畿甸兮茅苴居其百九人景希兮欲多求之孰  
有孫權石而左陂兮復前隄而後堰萬斛舟兮望悠揚  
而罔見芭苴昌兮根微蠹兮弗充君門狗之吠狺狺兮  
圓月噎於雲霧足余進而趙趙兮矢嘒嘒之靡入思昌  
儻而歸印綬兮啜哀傷而雨泣謂何求之喧泯渾兮知  
此憂云實鮮余中切而深慮兮羌謂之回遠置憂民於  
以為國兮胡國憂為毋害敢稱民而自佚兮以求其安

泰僥天命之畢罷休兮余心之有得聊遲留兮敝詞而  
自釋

解崇賦

有序

唐柳宗元

柳子既謫猶懼不勝其口筮以玄遇干之八其贊曰亦  
舌燒城吐水於蜥其測曰君子解崇也喜而為之賦  
胡赫炎熏煬之烈火兮而生夫人之齒牙上彈飛而莫  
遁旁窮走而逾加九泉焦枯而四海滲涸兮紛揮霍而  
要遮風雷唬唬以為橐籥兮回祿煽怒而喊呀炖堪興

為甌鋹兮熱雲漢而成霞鄧林大椿不足以充於燎兮  
倒扶桑落棠膠輻而相又膏搖脣而增熾兮齧掉舌而  
彌葩沃無餅兮撲無簞金流玉鑠兮曾不自比於塵沙  
獨淒已而煥物愈騰沸而骹齧吾懼夫灼爛灰滅之為  
禍往搜乎太玄之奧訟衆正訴羣邪曰去爾中躁與外  
撓姑務清為室而靜為家苟能是則始也汝適今也汝  
遐涼汝者進烈汝者賒譬之猶豁天淵而覆原燎夫何  
長喙之紛拏今汝不知清已之慮而惡人之譁不知靜

之為勝而動焉是嘉徒遑遑乎狂奔而西僚盛氣而長  
嗟不亦遑乎於是釋然自得以冷風濯熱以清源滌瑕  
履仁之實去盜之今冠太清之玄冕佩至道之瑤華鋪  
沖虛以為席駕恬泊以為車瀏乎以遊於萬物者始彼  
狙雌倏施而以崇為利者夫何為邪

謫九年賦

唐  
劉禹錫

古稱思婦已歷九秋未必有是舉為深愁莫高者天莫  
濬者泉推以極數無踰九年伊我之謫至於數極長沙

之悲三倍其時廷尉不調行當政而天有寒暑閏餘三  
變朝有考績明幽三見顧竟之民今亦昏墊而有歎歎  
息兮徜徉登高兮望蒼蒼突弁之夫我來始黃合抱  
之木我來猶芒山增昔容水改故坊童者鬱鬱兮涸者  
洋洋天覆地生蓊兮無傷彼族而居鄉之投荒彼軒而  
遊昨日析楊信及澤濡俄然復常稽天道與人紀咸一  
債而一起去無久而不還焚無久而不理何吾道之一  
窮兮貫九年而猶爾噫不可得而知庸詎得而悲苟變

化之莫及乎又安用夫肖天地之形為

問大鈞賦

有序

唐劉禹錫

始余失臺郎為刺史又貶州司馬俟罪朗州三見閏月  
人咸曰數之極理當遷焉因作謫九年賦以自廣是歲  
臘月詔追明年自闕下重領連山郡印綬人咸曰美惡  
周必復第行無恤歲杪其復乎居五年不得調歲二月  
有事於社前一日致齋孤居慮靜滯念數起伊人理之  
不可以曉也將質諸神乎謹貢誠馳精敢問大鈞其夕

有遇寤而次第其辭以為賦

圓方相函兮浩其無垠  
窅冥翕闢兮走三辰以騰振  
孰主張是兮有工其神  
迎隨不見兮強名之曰大鈞  
歌以臨下兮巍乎雄尊  
天為獨陽高不可問  
工居其中與人差近  
身執其權心平其運  
循名想像或可以訊  
曰嘻蒙之未生其猶泥耳  
落乎坳埴唯鈞所指  
忽然為人為宰大矣  
工賦其形七情與俱  
嗇智不受界之以愚  
坦坦之衢萬人所趨  
蒙一布武化為畏途  
人或譽之百說徒虛

人或排之半言有餘物壯則老乃唯其常否終則傾亦  
不可長老先期而驟至今否踰數而巨量雖一夫不獲  
兮亦大化之攸病謹薦誠上問兮俛伏以聽是夕寢熟  
夢遊乎無何有之鄉抗陛級乎重霄兮異人間之景光  
中有威神巾金巾而煒煌命之使前兮其音琅琅曰吾  
大化之一工也居上臨下廉其不平汝今有辭吾一以  
聽播形肖貌生類積億索齋園匡鎔鍊消息我之司智  
初不爾晉不守以愚覆為汝賊既賦汝形輔之聰明盍



求世師資適攸宜胡然抗心遐想前烈倚梯青冥舉足  
斯跌韜爾智斧無為自伐鑿竅太繁天和乃洩利運前  
誘多逢覆轍名腸內煎外火非熟今哀汝窮將厚汝愚  
剔去剛健納之柔濡塞前竅之傷夷兮招太和而與居  
貫以待人兮急以自拘道存壺興無示四隅軌物之勢  
不作兮見傷之機自無汝不善用吾焉嗇乎且夫貞而  
騰氣者膺膺健而垂精者昊昊我居其中猶輪是蹈以  
不息為體以日新為道保鱗蜚走灌莽苞阜乃牙乃甲

乃殂乃剖陽榮陰悴生濡死槁各秉氣化不以意造賦  
大運兮無有淑惡彼多方兮自生醜好爾奚不德余以  
驟壯姑尤我以速老邪觀汝百為又或不然赤子哇哇  
忽其能言亦既名物幾時蹢躅春耕其丘投種之日釋  
耒而歎何時實粟望所未至謂余舒舒欲其久留謂我  
譬如我一子二誰之曲與彼蒹葭之蒼蒼兮霜霰苦而  
中堅松竹之皴皺索籜兮不若櫛筍之可憐納材葦而  
構明堂兮固容消而力完揚且之哲兮不可以常然當

錫爾以老成蒼耆皓髯山立時行去敵氣與矜色兮喋  
危言以端誠俾人望之悔黷不生爾之所得孰與壯多  
不善處老問余而何受教而迴遽遽形開嚮之威神孰  
為來哉乃遽衣促盥端慮滌想委佩低簪持簿叩額而  
言曰楚臣天問不訓今臣過幸一獻三售始厚以愚終  
期以壽忘上問之罪濯已然之咎心增故術腹飽新授  
馳神清玄拜手稽首

三黜賦

宋 王禹偁

一生幾日八年三黜始貶商於親老且疾兒未免乳呱  
呱擁泣六百里之窮山唯毒蛇與贊虎歷二稔而生還  
幸舉族而無苦再謫滌上吾親已喪几筵未收旅櫬未  
葬泣血就路痛彼蒼兮安仰移郡印於淮海信靡鹽而  
軟掌旋號赴於國哀亦事居而送往叨四入於掖垣何  
寵祿之便蕃今去齊安髮白目昏吾子有孫始笑未言  
去無騎乘留無田園羝羊觸藩老鶴乘軒不我知者猶  
謂予郎官貴而郡守尊也於戲令尹無愠吾之所師下

惠不恥吾其庶幾下和之朋吾乃完肌曹沫之敗吾非  
與尸緘金人之口復白圭之詩細不宥兮過可補思而  
行兮悔可追慕康侯之畫接兮苟無所施徒錫爾而胡  
為效仲尼之日省兮苟無所為雖歎鳳而奚悲夫如是  
屈於身兮不屈其道任百謫而何虧吾當守正直兮佩  
仁義期終身以行之

三黜賦

以直道事人宜  
乎三黜為韻

宋 李綱

賢若下惠官為士師以直道而從事乃屢黜之為宜忘

已為人何爵祿之足惜舍生取義豈威武之能移法古  
守官屈身徇道位雖卑而道何所辱義或失則位焉敢  
保寧尸祿以素餐將啜菽以忘老君違必諫雖犯顏而  
何傷天聽孔昭恐獲罪之難禱何則忠以得罪分焉所  
甘以所守之惟一故遭黜而至三用則行而舍則藏顧  
有進則有退仰不愧而俯不怍夫何懼而何慙枉道事  
人奚必去父母之國直心行道焉往無譖愬之誅惟君  
與臣代天理事各盡其職非相為賜諫行言聽固同享

於安榮道廢身藏亦何心於怨懟惟知則止之節乃盡  
事君之義相彼君子異乎小夫以容悅得君為至計以  
緘默固位為良圖蓋亦陋矣何足算乎老栢千年凡幾  
經於凝馭精金百鍊乃可試於洪爐惟此展禽雅安降  
逸雖不辭於小官亦弗免於三黜蓋以和制行者所以  
與人為徒以直事人者所以本天之質類夫子文之稱  
忠喜怒不形於仕已有得益剋之不動榮辱豈存乎得  
失矧乃作士利用刑人上下其手而楚國以獎輕重其

心而漢法以淪徐有功之任司刑守法而代人以死張  
釋之之為廷尉讞獄而舉世推仁蓋聞風而有立雖愈  
久而彌新爰有畸人號為拙直荷三朝之眷遇辜負明  
恩雖九謫而終歸敢忘大德惟內省不疚於聖言顧用  
舍豈繫於人力味前哲之遺風每撫篇而太息

謫居賦

宋 張九成

嗟余之生兮西湖之濱煙雲為家兮風月為鄰一行作  
吏兮喪厥真筮仕會稽兮繼命奉常著作東觀兮出持



刑章未及佩印兮讒口傷世路險巇兮人情澆薄拂衣  
歸來兮求志獨樂溫詔三下兮辭不獲卿宗正兮侍玉  
座談堯舜兮上盛古小宗伯兮義則可知難而退兮奉  
偏親庭闈之樂兮如三春奇禍作兮湘江奔天忽崩兮  
骨欲折心糜潰兮目流血日月馳兮成永訣禍又作兮  
事更危天心仁兮哀憐之免余死兮竄江西維茲地兮  
古橫浦嶺之北兮江之潯團瘴煙兮飛霧雨七年於茲  
兮無與晤語俗目並觀兮吾何以處惟吾早聞道兮傳

孔孟用聖心兮履聖行曰君子謹獨兮無愧忤聖人樂  
天兮無適莫夏葛冬裘兮何用美飢食渴飲兮無求備  
神明昌兮窮不諱道義重兮物偕逝優哉游哉聊以卒  
歲

釋謀賦

宋 王安石

雲冥冥兮蔽日風浩浩兮吹沙出予馳兮不得塊獨處  
兮咨嗟嗟天地兮無窮暑與寒兮相容以短褐兮憂親  
孰知予兮孔棘維抱闕兮擊柝乃予仕兮所宜祿可辭

兮尚冒養孰割兮方虧豈吾事兮固拙寧我辰兮獨悖  
信物默兮有制尚可侔兮內外

定觀賦

有序

宋陳造

張君錫鬻不利秋闈作賦見遺辭意竒壯作定觀賦答  
之其辭曰

面頰之敷腴胸襟之恢疎譚辯之傾輸子張子眇眇高  
蹈力雄萬夫我孳孳於南州闔風壑之於菟揆若人而  
當價金華蓬山信其有餘固宜山澤之腥儒也哉胡乃

蘭傷玉缺盤跚蹙蹙黃金注而得昏美璞獻而遭刖撫  
蒯緱而三歎駭霜蹄之一蹶方且寓喑鳴於雕蟲之技  
陶性真於杯中之物陳子曉之曰事之宜然而或不然  
者天之勝宜然而不得不然者人之定洞視天人之表  
而不吾滑焉君子之善應鄉也覩然笑今也愀然悲蓋  
未始得其正彼其搖搖於寵辱之樊皆於理聽之瑩乎  
夫聖之遂忠之剖賢也而臞盜也而壽理好乖於所期  
是故諉天者得以啓其口羿之射有撥其矢石之斤或

掣其肘然竟非拙工之敢偶蒲梢以一跌而棄夜光以微累而培孰非市駿藏寶者之咎以定觀之人之勝天也久矣子其尊所有勉所無翦肩文藝之數周旋道德之塗吾見夫至寶橫道隨和過之必且攘取而疾趨則夫儻於前而振於後遺之寸而收之尺顧何歎歟彼託意於酒者古人有之而或以蕩心而敗德聲其怨於文者君子許之猶未足與語超然自得之徒羌吾言之率爾子其繹之是邪非乎子張子作而謝之其貌舒舒其

氣愉愉若不知得喪欣戚之何如

遣幽賦

宋張耒

居子子以無與兮出莫知其所之獨端居以終日兮耿  
默然而長思古之人不可得而見兮存者滅略之遺辭  
顧一世之異情兮余誰者其從之惟我生之拙迂兮嗟  
所慕之名奇挹廉清之遺風兮曰吾其進難而退易百  
驅不加於跬步兮却轡疾返而莫追踐斯言之不欺兮  
庶吾心之無愧日月忽其遷流兮老忽忽而既來惟所

蹈之日迷兮撫前心而自非欲改故而圖新兮從靈龜  
而問疑兆改橫而上從兮史謂余而告斯橫為室而善  
處兮上從直達其無熾宜外拘而中泰兮或者既寒而  
將遂保爾守而無變兮神明於汝其遺之相利害而為  
術兮彼鄉人其猶恥美靈龜之告猷兮我心之所止彼  
蹢躅其安往聊安安以自恃歲冉冉以將老兮草木颯  
其告衰去蟬號乎高柳兮溢菡萏於清池宵蟲悲鳴以  
相語兮朔羽振汎而南窺嗟吾客於東周兮周天星之

三移寫吾憂以命駕兮憑高明以遠視覽平田以茫泱  
兮瞰清洛之東駛山重複而南積兮杲嶺矗矗以鱗次  
微雲霍霍以忽布兮孤翼滅沒而高遊熊耳高高而西  
峙兮女几奮湧而南危東平川於兩間兮散佃漁於平  
地雞犬密其相聞兮滿塍布而如碁牛羊閒以就牧兮  
烏鳥號呼以羣嘻登故國之餘墟兮望遺宮之頽基傷  
者來世而無窮兮樂者昔人其既止惟達觀其超忽兮  
等廢興於一視考物變以自樂兮遺餞情於酒醴大人



無即而非樂兮淺夫繫物以自治彼方害我以局促兮  
我則顧步而廣肆制憂樂於在彼兮天何貴乎明智忘  
吾憂以洋洋兮將以語夫君子

幽懇賦

有序

元  
郝經

上即位之元年詔經更成於宋宋人逆之入置於儀真  
姦宄漏國相與構陷誣為款兵不受書命且偽報異聞  
者再遂不令進退自庚申至於甲子凡五年冬十有一  
月宋人乃報其國喪而復無縱釋之命幽抑無紀極而

莫適赴愬作幽愬賦以自釋辭曰

天明監觀弗蔽兮莫表著以誠陳各蹈道以執則兮于  
坦夷兮是循惟禮與信為通達兮俾行李以問津顧率  
履之弗越兮何虎尾之啞人棘予裳而柅於車兮竟蠖  
屈而莫信滑溟滓以造艱兮胡構台以愆辰習坎而入  
於坎窞兮遂蒙羃乎穹昊塊百折而憤於下兮墜沉坳  
而無極薦局側於眚井兮重覆盆而擠石鬱憤默而屯  
惛兮觸黝然其若漆躋泥塗以墊隘兮薄湫壤而淫濕

頓濡滯而墜底兮疾重脰以侵賊混河魚與谷鮒兮麥  
麴窮兮馬所得顛連而無攀援兮仰千仞兮無涯溪責  
躬而反己兮抑不知其所自粵台宗之權輿兮兆玄鳥  
以降殷託帝乙之支屬兮分方祚於太原蟬聯而曼延  
兮委落族而紛綸羌台弱植之熒特兮乃繼序乎其季  
振迅而自亢兮欲託始以立世襲皇風之氤氲兮紉幽  
蘭以為繫冠章甫之巍峨兮錯瓊瑰以為佩握火齊於  
天衢兮挽扶桑以載燧造高朗以正大兮灼羣昧而用

晦攄混沌之滓穢兮萃元精之純粹衣堯兮服舜仁為  
旗兮義為勒堅窮而石守兮望道圓而日進絕縱兮追  
塵弗以為遠也探神區而挹道真軼乎無極之近也渴  
日而不得留兮乃以夜而為晝葺江籬以為裳兮褰芙  
蓉以為袖危薜芷以挾芳兮濯爛錦而搗繡步驥驟於  
康莊兮翥鴻鵠於雲霄越希有而出大荒兮乃度夏而  
絕遼汎洙泗以揚波兮扇之乎以清飈掇蕙茝而抔瀼  
露兮灑旭日而晞蘭苔遶靈修之際嘉兮下弓旌以為

招謂黎元之無告兮久遇毒於荼苦方焦糜於非鏹兮  
又薦之於刀俎俾顛連之赤子兮化白骨而撐拄血肉  
膏於原野兮腐棲直而橫宿莽閔軀兒而拏蛇虺兮翳  
三光而汚九土朕盡焉其傷心兮宜為民之父母汝其  
為吾蓋臣兮數余乎於吳楚轉一氣為陽春兮暴疋魑  
為靈雨已載干戈兮朕亦願為好生之主越拜手稽首  
兮迄續民命則在乎茲舉畀龍節而錫虎符兮繚霞旌  
而凜霜仗遺黎若崩厥角兮將慰乎雲霓之望引餘息

而煦之以天吹兮鼓太和之泱泱變時雍而底定兮鰥  
孤廢疾者而有養攀三五以反旆兮輅成康而掉鞅姦  
宄遽為之閑塞兮潛不知其故也方血人於齒牙兮盜  
憎主人而惡也更余御而不使之行兮斷予轡於路也  
衆衆不識夫鸞皇兮謂予日之暮也嗥噪而各為兇聲  
兮乃遷台以怒也懷照乘與夜光兮適閭擲而召疑謂  
魚目與瓦礫兮乃翻誠以為欺棄神鼎與和氏兮以康  
瓠瓠珠而為奇如射工之伺人兮故巧發其陰機弗為

社稷之遠猷兮姑詭過於一時好逆而寇來兮則予焉  
所知會衣裳而衷甲兮執魯連為鍾儀薦棘而重圍兮  
隔天日兮江之濶邇迴而屯以邇兮設羅畢而為之縻  
錮陰谷而高且深兮入而不使之去也為嚇逼之千端  
兮覲予改於步也奈予心之不移兮屹乎不周之柱也  
倏歲月之屢遷兮春與秋其代謝交一臂而閱之兮身  
乃為之傳舍方氣數之締充兮予曷能與之爭天定亦  
能勝人兮而偽烏能易余之誠戴片天以兀處兮而豈

能拘余之心欲天飛而道游兮曾不知予身之陸沉冥  
搜而坐馳兮迅祥飈而邁往激九萬之扶搖兮欵上征  
而遐想將寧瑤芝於玄臺兮憩於帝而稱罔虎豹乃守  
天門兮列魑魅與魍魎犬詵詵而吠人兮闔帝閭而弗  
敞仰天而呼兮孰讎吾民而若是之阻修台聖非姬昌  
與玄王兮曷為亦在夫夏臺羑里之幽豺虎縱橫兮麟  
獲而為囚鱣鯢拉其鬚鬣兮乃突梯乎蜃鮪王睢喑而  
不鳴兮蜩鳩肆其啁啾雜芳蓀於薺菜兮竟不別夫薰



猶日方中而見沫與斗兮蹇予之行孰為此謀挾李順  
與荀純兮王驪入室而操矛漏國而倒刺兮委而莫予  
問也呼天而無與言兮撫予膺而自恨也蹇予業已如  
是兮第不忘乎吾民翩然還歸顧自視兮面四壁而無  
聞余節槩而增塵兮眇隻影而無倫漫勞心而憊憊兮  
輒申旦而弗寐載命龜而虔卜兮復端策而訊筮吉弗  
食而數奇兮再三瀆而莫契鬼神亦台違兮予焉得而  
請於帝登天而不可兮乃益入於地悠然靡所薄兮曾

不知其為計望燕雲而不見兮聽哀鴻之嗷嗷靈修不  
可以有為兮遽違遠而鬱陶懷猷而孰為矢兮屹魏闕  
而夢勞緊眇末有以召是兮祇怨艾而自責必操存之  
頗僻兮有菟惡與隱隱無乃不能制欲兮勝於理而不  
德亦其饗功而冒進兮任乎重而弗克則亦遂非而崇  
侈兮不能執中而過以不及或昧夫幾而闇以顯兮窒  
於物而彊以塞孝不能盡親兮忠不能盡於君信不能  
及友兮誠不能格夫人是用底於寔跡兮則皆自夫予

身內咎而不敢誰尤兮中隱畏而酸辛第予之所奉行  
兮禮人而篤夫動也縱或有以自取兮何為至此極也  
戢兵兮止殺則吾君之仁也輸平兮繼好非有惡於渠  
也止予兮將焉求則亦徃禍於渠也前修與已事兮可  
以鏡視而新是圖親仁兮善鄰乃為國之訏謨合則所  
以福吾民兮阻則頓夫師徒繫天誘吾衷兮吾民之禍  
庶有彡行人竟何辜兮羌見羈而反害夫澶淵與靖康  
兮於得失之跡則固在和安而戰危兮前轍宜以為戒

謂江南之文物兮可以繼夫三代釋子卿而俾之歸兮  
乃曾不如勾奴闕太和而徵倖兮反信用乎矯誣誤國  
而不自知兮曾漢唐之不如嗟台身之在天地兮眇太  
倉之一粒吾君之命不辱兮死生不足為得失和龍之  
赤氣兮鬱固有所積也自惜怙私而召亂兮從顛隕而  
弗恤也蹇台焉所望兮乃援溺而入於羽淵時不可以  
驟合兮竟却走而不前苟非台之所召兮則壞運其自  
天顧台所懷之貞珉兮猶未至於玷缺故佩之杜衡兮

有芳荃以為結擷中庭之霜華兮  
旆之乎吾之節擘江雲而綴天星  
兮噫孤風而挹明月吸素霓與清氛  
兮雖閭室而益白潔已而莫予污兮  
挺節而莫予折截玉而斷鐵兮冽冰  
而凜雪不欺天而負君兮庶無愧乎  
前哲從野馬與塵埃兮溷狐兔而蹠  
血已地坼而天傾兮猶不愆予之說  
在我者亦既盡兮安得復為之喋喋  
亂曰與其惡蒙以求明兮曷若靜固  
以養正兮與其行險以微利兮曷若  
安時而委命兮世固不予知兮謹獨  
聖之

令也幽所以益吾之修兮屋漏則致予之敬也非予殄  
天民之澤兮殃民者固為之宰也

憂釋賦

元  
楊維禎


天之何為使聰明而無信兮明畏之無神賢不必福兮  
壽不必仁不義而富兮好禮而貧黷以考終兮聖泣袂  
於路隣冶綫身於非罪兮丹櫻疾於哲人曾日食以萬  
資兮侃九餒於旬之期即三葉而不邁兮七世或襲其  
遺飽侏儒欲死兮長九尺者飢司造虧羨兮偏既反而

曰迪逆其猶影響兮吾壹不知惠從之所歸匪仁吾弗  
依兮匪義吾弗據培德植之翹翹兮願俟時乎吾將茹  
夫何好修者見殃兮曰告予以不淑饑饉降喪兮艱我  
水菽三釜需養兮風拔庭木言陟於此兮背樹隨覆填  
孰哀其岸獄兮變孰恤其困飢惡青蠅之伺物兮肆射  
工而含機紛碩鼠之貪婪兮亦既樂萋楚之無知曾歎  
戲而侘傺兮適窮困吾此時也鮮民之不如無生兮何  
久處乎此罹也吾令箕伯叱風兮溘乎余將逝也指閭

闔以開關兮跪敷衽於帝也愍夜田以貸恩兮貨車子  
以可假感寄輦以泄私兮亦逃資於晝火界懷鳩以薦  
休兮賂銅鈎又為禍漫鑄山以穰餓兮抑富私而不果  
彼蒼茫以無端兮固遭遇之無恒既克定其誰憎兮諒  
靡人而弗勝遂逆境以順受兮乃先民之所程褊不怨  
夫漂瓦兮茫耳外之蜚聲吾何為不豫兮其無以心而  
累形曰相訓而助信兮吾將俟久於天人之監明諱曰  
棘人藥藥條其轍兮不自先後集百蓼兮輪根屈盤別



利器兮事會輻輳見貞士兮怵迫應物好惡眈兮窟若  
囚拘宜識道兮夷險遷乘鱸變化兮泰宇泊然吾何疑  
於芟薊兮



御定歷代賦彙外集卷五

欽定四庫全書

集部

御定歷代賦彙外集卷六

詳校官檢討<sub>臣</sub>劉圻

主事銜<sub>臣</sub>徐以坤覆勘

總校官編修<sub>臣</sub>王燕緒

校對官中書<sub>臣</sub>王慶長

謄錄監生<sub>臣</sub>龔際美

欽定四庫全書

御定歷代賦彙外集卷六

言志

明意賦

有序

晉  
傅咸

侍御史傅咸奉詔治獄作賦用明意云

舍控款以彌載令棲遲以淹留吏砥身以存公古有死  
而無柔彼背正以從邪我沒世而是尤數腎腸以為效  
兮豈文飾之足修感恩輸命心口自滅加我數年竭力

效節春秋既不吾與日月忽其不屈周道兮如砥吉人  
兮是由材曲兮枉撓朽木兮難抽

釋懷賦

有序

唐李翱

讀黨錮傳哀直道之多尤不容作釋懷賦其辭曰  
懷夫人之鬱鬱兮歷晦蚤而傷離吾心直以無差兮惟  
上天其能知衷於德而必好兮忠何尤而甚疑彼陳詞  
之多人兮胡不去衆而訊之進盡言之不信兮退遠去  
而不獲弗驗實而考省兮固余道之所厄昔師商之親

聖兮德既均而行革惟肝腸之有殊兮守不同其何責  
願披懷而竭聞兮道既塞而已行路非險而不通兮人  
忘我而異情王章直而獄死兮李固忠而陷刑自古世  
之所悲兮矧末俗之衰誠良貞心之潔白兮疾苗莠之  
紛生令農夫以手鋤兮反翦去乎嘉莖豈捐穢而語之  
兮詳瞪瞠而不肯聽欲釋去而不忍兮終留滯亦何成  
當晨夕而步丘兮仰白日而自明處一世之若流兮何  
久求而傷情樂此言而自抑兮壯大觀於兢生拔馨香

之荳蘭兮樹蒿蔚以羅列斥通路而使蕪兮戀棘逕之  
中絕置春秋而徇心兮羌與此其奚別昔誓辭而約文  
兮期共死以皆居嗟所守之既異兮乃漫汙而遺初心  
皓白而不容兮非市直而望利忠不顧兮立志交不同  
而行棄悲夫不徇己而必仇兮諒非水火其可畏猥吾  
行之不然兮直愧心而懼義嘉山松之蒼蒼兮歲苦寒  
而亦瘁吾固樂其貞剛兮夫何尤乎小異欲靜默而絕  
聲兮豈不悼厥初之所志抑此懷而不可兮終永夜以

欽敬

幽懷賦 有序

唐  
李翱

朋友有相歎者賦幽懷以答之其辭曰

衆囂囂而雜處兮或嗟老而羞卑視予心之不能然兮  
慮行道之猶非儻中懷之自得兮終老死其何悲昔孔  
門之多賢兮唯回也為庶幾越羣情以獨去兮指聖域  
而高追固簞食與瓢飲兮寧服輕而駕肥望若人其何  
如今慙吾德之纖微躬不田而飽食兮妻不織兮豐衣

援聖賢而比度兮何僥倖之能希念所懷之未展兮非  
悼已而陳私自祿山之始兵兮歲周甲而未夷何神堯  
之郡縣兮乃家傳而自持稅生人而育卒兮列高城以  
相維何茲勢之可久兮宜永念而遐思有苗之逆命兮  
舞干羽以來之惟政刑之既修兮無遠邇而咸歸當高  
祖之初起兮提一旅之羸師能順天而用衆兮竟掃寇  
而戡隋况天子之神明兮有烈祖之前規劃弊政而還  
本兮如反掌之易為苟廟堂之治德兮何下邑之能違



哀余生之賤速兮包深懷而告誰嗟此誠之不達兮惜  
此道而無遺獨中夜以潛歎兮匪吾憂之所宜

幽懷賦

元  
朱德潤

肇姬封之邾裔兮老睢陽之曾孫歷淮漢而屆都兮瞻  
邦畿之無垠茂品物之化育兮醞六合而俱春攬太古  
之象教兮齊民風而俗淳何世隆兮謂其時兮欲窮而  
怵生兮寵專而勢危物情膠而謹論廢兮異端行而政  
教虧禮度疎兮豪猾僭兼并盛兮良民饑饉寒迫兮廉

恥喪苞苴行兮仕祿卑淫祀盛兮正直塞游食多兮末  
技施我思古人兮邈其遠而觀所行兮或放或持盡大  
智兮勿機躬力行兮弗馳享尊榮兮弗榮臨患難兮弗  
欺苟余心之無慊雖衆毀而何疑宜矯世兮獨立俟同  
心而可為嗟盛年之不偶撫朱絃兮自悲儻效用之得  
所雖沒身其何辭秋風兮木落遠道兮陸離取幽懷之  
惓惓兮慕重華而致詞顧臯夔之謨明兮歷康衢而歌  
之

秋懷賦

宋 劉 敞

世量力以為智兮孰不自師其成心不强短以彼修兮  
亦各濟其所任蓋周任之明清兮予嘗服於德音性專  
直其似愚兮遂底滯而廢沈惟古人有不遇兮亦奚慨  
於斯今昔既冠而從仕兮冀陳力而帥職何日月之不  
淹兮疊疊至乎不惑世與我其異衷兮增余懷之默默  
數廢日而倍參兮願自竭而安得將奔而及事兮愧初  
心而變色譬游者之無術兮念愈躁而愈沒荷衆賢之

并容兮曾介善之不遺辱興廉之末舉兮遂以造夫攸  
司君之門不可以徑入兮既待詔而歷時唯偏心之狷  
狹兮樂繩墨其自持誠詭遇其有獲兮雖得獸而恥之  
信天命之有在兮非智勇其孰勿疑時既秋而涼風兮  
草木落而變衰日月麗於西廂兮蟋蟀迅而鳴悲閱四  
序之代謝兮既逝者之如斯悼我心之弗獲兮起惆悵  
而稱詩

壯懷賦

有序

明

黃尊素

予幼落拓不肯斤斤作俗士面目長逢數奇歲月漫漶  
壯懷未展每思往昔豪士縱神所往自許必遂豈有跼  
蹐竊穴中碌碌此身邪易水既眇壯士空歌翔風唾壺  
尚在老馬忍甘伏櫪因感而賦焉

眇眇七尺有軀與質為隱為見同歸於息惟神獨往超  
世獨立能汗漫於九垓兼馳騫於八極高欲與鵬鷺比  
翔卑不與雞鶩爭食憶昔楚有二胥一覆一復去時矢  
盟別後自戮或就蘆中而覓津或赴秦庭而痛哭途窮

而白骨答師出而封豕逐若夫會稽囚臣伯越亡吳遊  
麋鹿兮蘇臺乘煙浪兮五湖變鷗夷兮遠遁笑厲鏖兮  
何辜若乃咸陽鑄金胡亥踐阼傭耕養鴻鵠之羽戍卒  
築鯨鯢之渡揭竿斬木社沈廟墮長城遂傾阿房非故  
若乃蘇卿漠北一鴈孤飛聽胡笳而情斷望隴雲而魄  
馳見節旄之盡禿寧甘心於乳羝謝朝露之陟言嚙氈  
雪而何辭至如寄絲桐江混迹羊裘漁舟唱晚釣石蘆  
秋領浦口之風月辭麟閣之遠猷星已分於客帝貴不

辨乎王侯至於祭酒布衣投筆而起繫馬於龜茲部下  
斬首於烏孫帳裏諸番匍匐稱壽都護端居自喜玉門  
回轅定遠開址或乃少年健兒別妻從軍擊楫中流之  
濤請纓金馬之門鳴劍則蛟龍夜吼展旗則風雲晝屯  
乍棄繻而出塞忽奏凱而銜恩或乃照藜書生生花詞  
客歌叢桂於小山賦長楊於鴟鵂筆精墨妙神驚鬼泣  
買賦皇宮藏書石室或乃成仁志士報國孤心舌能罵  
賊血可濺襟嬰城矢石之衝厲聲劍戟之林山河震而

色慘風雲蔽而回陰或有信陵義魄朱家俠腸意至鞭石可橋心許投鼎何傷符竊而晉鄙椎髡鉗而亡命藏卒能脫邯鄲於虎口守季布於淮陽自古及今莫不有落落之豪懷英英之氣岸吞河岳以為雄貫星虹而俱燦若游魚之逝淵而犀然莫窺若雕鶚之橫空而風高獨戰雖劫燼而不灰至海枯而不變僕亦壯人壯懷未隕紉蕙茝而獨馨嗤三閭之自窘木經霜而愈堅劔礪石而不損願蹠躩於天衢乘長風於一瞬於時揮就鸚



鵠飛動江關勢驚鉅鹿之軍氣壯朔方之垣女媧之石  
天補魯陽之戈日還其漂疾而難禦也如廣陵之潮其  
嶙峋而莫躋也如峨嵋之山攜夸父之杖而太陽可逐  
秉博望之槎而星漢可攀南則鑄柱交趾北則勒銘燕  
然爾乃挂梅冠解疏綬結茅屋穿石竇尋素心之侶鞭  
達生之後相與風清垂釣雲深採藥買青山而招隱覓  
孤舟而放鶴晝吟離騷之章夜談黃庭之略訪禪支遁  
攜屐康樂林不厭深流不厭濁思專美於千里問旨酒

於下若目前不必問天餘生亦已有幾窮愁是迷陋彼  
虞卿孤憤著書是卑公子吾黨如可披心為道壯懷如  
此

思還淳賦

唐

吳筠

伊太素之玄風迨羲軒而浸隱雖朴散以成器暨唐虞  
而未泯淳化日以淪亡及殷周而殆盡唯挺生之尼父  
覩澆漓而致憫乃修詩書制禮樂以救崩隕將驅末駕  
以旋軫玄元適彼流沙遺道德於關尹信文約而義賾

俾浮競以返本固天運之推遷雖聖人亦不能扶其顛  
隕五霸既沒七雄交馳爰至暴秦儒殘道隳皇漢底定  
人懷緝熙孝文御宇所向無為刑法幾措歡心秉彝孝  
武好夫征伐亦兼崇於典儀雖純懿未舉而文章載施  
元成懦弱政教陵遲彼蒼生息肩之日在世祖中興之  
時何孝明之匪德為祆夢之所眩創式神之祠宇遵恍  
惚之妄見始涓涓於濫觴終浩汗以流羨歷三國而猶  
微更五胡而大建華夏之禮廢邊荒之風扇沴氣悖以

興行人心颯以傾變遂悔君親茂彞憲髡跣貴簪裾賤  
事竭思以徵福劣含疑而懼譴上發跡於侯王下無勞  
於獎勸尊勳肩之金狄列崢嶸之紫殿伐千畝之竹不  
足紀荒唐寓言傾九府之財焉能充悃款誠願於是寶  
樹瓊軒凌雲照日鏗鏗窈窕不可談悉越章華之宏壯  
羅區宇而櫛比棟宇以來未有儔匹重貝葉訛謬輕先  
王典籍欽刑賤鄙夫宴廣廈精室使白屋終勞緇門永  
逸自國至家祈虛喪實虔而是者則紹之以嘉祥沮而

非者則欺之以罪疾故中智已下助成其姦宄之術可  
謂至真隱大偽出所以孽黨妖徒此焉遊息儲不因耕  
衣不俟織誘施冒貨鯨吞蠶食若蛟螭之在水猶豺豹  
之附翼罔不假小善以外慈藏深邪而內賊豈止一時  
之封豕乃為萬代之蠹賊足使宵人得意而傲睨上士  
傷心而憫默於戲天道乎人事歟天道遠而難曉人事  
近而可詳雖孽自天啟亦祇由人彰斯乃鍾劉石之兩  
羯偶符姚之二羌憑胡書之詆譎資漢筆以闡揚道安

討論於河洛惠遠潤色於江湘圖澄挾術以鼓舞羅什  
聚徒以張皇跡無徵於班馬理唯竊於老莊褒蠶陬為  
中工貶諸夏為偏方務在乎噬儒吞道抑帝掩王奪真  
宰之柄操元化之綱自古初以逮今未有若斯之弊逆  
天暴物干紀亂常爰自晉宋迄於齊梁靡不興之者滅  
廢之者昌竟流遁而不返終取悔以危亡考其故何哉  
益蓼蟲忘卒習其久翫將助其理反增其亂若運窮數  
極則君悟臣斷億兆不謀而密移神祇應感而冥贊山

川為之澄穆日月為之炳煥自然朝思文明野冀貞觀  
譬曾冰之堅積非陽春不能使之剖泮當是時也太上  
有命爰徵萬靈敕司姦以糾慝遣執法以詳刑五帝合  
符三皇同征乃命天將總天丁伐天鼓揚天旌揮金鑲  
擲火鈴使列缺激迅霆出昭曠入杳冥捕無影搜無聲  
獲妖師殲氛兵正太階埽梟梟盪遺祆於千載流忠澤  
於八紘班師下土歸功上清然後人倫可以順化神道  
可以永貞變訛僻之俗為雍熙之毗佇淳風之克復吾

乃鼓腹擊壤於巖垌吟詠柏皇與驪連大庭而已矣

傷已賦

宋 謝靈運

嗟夫卞賞珍於連城孫別駿於千里彼珍駿以貽愛此  
陋容其敢擬丁曠代之渥惠遭謬眷於君子眺徂歲之  
驟經覩芳春之每始始春芳而羨物終歲徂而感已貌  
顛顛以衰形意幽翳而苦心出衾裯而載坐闔檐幌以  
迴臨望步檐而周流眺幽閨之清陰想輕綦之往跡餐  
和聲之餘音播芬煙而不燠張明鏡而不照歌白華之



絕曲奏蒲生之促調

傷已賦

元馬祖常

嗟余生之多憂兮幾顛踣而數窮  
誓鰾言以自見兮力  
追古之高風呼天龍以駕我兮  
俾天使使為期何九稼  
之不一獲兮尚偃蹇而如茲  
豈剗剗之有不善兮將世  
德之下移薦芻艾於宗器兮  
綴履綦以璿璣封敦旒以  
塊泰岱兮謂汎濫其莫涯  
冠髻童以弁冕兮問禮意而  
莫知決大疑於淫鬼兮憑巫  
傅以度揆顧聖言之鞿勒

今指網維為械繫憫相通之無朋兮去一髮之幾希祝  
吾車之莫騁兮膠吾口之難辭懲前悔之不憚兮配古  
道其或可思一旦舍此而改圖兮念後余之病我日浚  
惡以啟堙兮患世之屏經而好權遭岐蹊之多迷兮世  
或謂其固然抱昌辭以適與我兮俟來學以偕行辨百  
家之糾紛兮孰察余之衷情亂曰我涉大波孰為航兮  
我載大塗孰為箱兮古聲嗶嗶金石之揚兮世無佞兮

閔已賦

唐  
韓愈

余悲不及古之人兮伊時勢而則然獨閔閔其曷已兮  
憑文章以自宣昔顏氏之庶幾兮在隱約而平寬固哲  
人之細事兮夫子乃嗟歎其賢惡飲食乎陋巷兮亦足  
以頤神而保年有至聖而為之依歸兮又何不自得於  
艱難曰余昏昏其無類兮望夫人其已遠行舟楫而不  
識四方兮涉大水之漫漫勤祖先之所貽兮勉汲汲於  
前修之言雖舉足以蹈道兮哀與我者為誰衆皆舍而  
已用兮忽自惑其是非下土茫茫其廣大兮余壹不知

其可懷就水草以休息兮恒未安而既危久拳拳其何  
故兮亦天命之本宜惟否泰之相極兮咸一德而一違  
君子有失其所兮小人有得其時聊固守以靜俟兮誠  
不及古之人兮其焉悲

閔已賦

有序

元  
任士林

正月八日獨坐雷公山中天氣風緊抱書自憐漸老醜  
之逼人慨盛時之不再匪私驛角恐墜肩牆作閔已賦  
庶幾成此志耳其辭曰

肆后皇之嘉貺具藐然之一身戴玄髮於芳鬢含纖齒  
於龐脣匪肖貌之我私獨降質之爾淳有賦予之重責  
尚隆緒之大振張余挾於幼眇自青襦而裹巾亦淳濯  
於羣污窺末光於德鄰孔孟吾之師不可以復夢兮為  
誰門之人願賜吾之友不可以遽作兮為誰居之羣倚  
泰山而長嘯俯黃河而孤嘶瞻飛雲於月下訪流水於  
回堤謂雲行而月跋兮亦升東而沉西謂水逝而隄在  
兮忽高岸之為谿理不可以逆曉事不可以深稽去者

非今之所推陷者非今之所擠來者不可以徑過降者  
不可以驟躋眇余思之茫茫隱余神之淒淒匪饑寒之  
足慮匪患難之足疑恫大志之未立矧絕學之無依人  
不能憂余之憂兮余亦不能悲人之悲聊走筆以自係  
走四方而陳詞庶聖道之未沫將援余之孤危

閔生賦

唐  
柳宗元

閔吾生之險阨兮紛喪志以逢尤氣沉鬱以杳眇兮涕  
浪浪而常流膏液竭而枯居兮魄離散而遠遊言不信

而莫余白兮雖遑遑欲焉求合喙而隱志兮幽默以待  
靜為與世而斥謬兮固離披以顛隕騏驥之棄辱兮駕  
駘以為騁玄蚪蹶泥兮畏避鼃黽行不容之崢嶸兮質  
魁壘而無所隱鱗介槁以橫陸兮鴟嘯羣而厲吻心沉  
抑以不舒兮形低摧而自慙肆余目於湘流兮望九疑  
之琅琅波淫溢以不返兮蒼梧鬱其蜚雲重華幽而野  
死兮世莫得其偽真屈子之悃微兮抗危辭以赴淵古  
固有此極憤兮矧吾生之藐艱列往則以考已兮指斗

極以自陳登高巖而企踵兮瞻故邦之殷鑠山水浩以  
蔽虧兮路窮勃以揚氛空廬頽而不理兮翳丘木之榛  
榛塊窮老以淪放兮匪魑魅吾誰鄰仲尼之不惑兮有  
垂訓之謦言孟軻四十乃始持心兮猶希勇乎黜賁顧  
余質愚而齒減兮宜觸禍以貼身知徙善而革非兮又  
何懼乎今之人噫禹績之勤備兮曾莫理夫茲川殷周  
之廓大兮南不盡夫衡山余囚楚越之交極兮邈離絕  
乎中原壤汙潦以漬汝兮蒸沸熱而恒昏戲鳬鶴乎中



庭兮蒹葭生於堂筵雄虺蓄形於木杪兮短狐伺景於  
深淵仰矜危而俯慄兮弭日夜之拳孳慮吾生之莫保  
兮忝代德之元醇孰眇軀之敢愛兮竊有繼乎古先明  
神之不欺余兮庶激烈而有聞冀後害之無辱兮匪徒  
蓋乎曩愆

閔獨賦

宋 祁

閔前人之抗志兮雖有適而遂迷恃我醒於皆醉兮矜  
獨是於衆非吾固知高木不得林兮孤音鮮與之諧持

立廢於曹踞兮一妍掩於萬媼舉吾黨以同寐兮嗟予  
覺其何之越家祀而訶鬼兮裸尸程而晒衣奮草辭以  
正議兮安足救輿談之參差發介瞭之精覽兮何預羣  
蒙之俚嬉屈自高以赴淵兮夷已信而餓薇波潰流而  
無益兮返蒙譴而被訾兮吾有道於此兮請質古而瑩  
疑狂者以不狂者為狂兮飲泉流而後宜非聖者以聖  
為非兮均獵較而免譏挫爾方而殺廉兮常偶欣而儷  
悲保獨行以中晦兮庶明哲而為期

擬閔獨賦

明  
葉良珮

閔諒貞之獨立兮，貼衆險以乘危。讐離披以隕穫兮，循  
本初而自思。始余之未有知兮，專六籍以爲師。朝帶經  
於兒圃兮，夕發憤乎董帷。物何幽之不鏡兮，理何微而  
不窺。既釋褐以從政兮，棼亂絲其難治。索慮謀於古訓  
兮，判與彼而異宜。心無歸之茫茫兮，疑簡策之我欺。步  
徙倚而遙思兮，寐展轉而反側。惟困極其必通兮，神恍  
惚若有得。曰道有玄機兮，而靡定式。秉時制用兮，妙存

悟識親賢爾輔兮稽古自益任重惟毅兮篤信靡惑惕  
靈魂以驚悟兮奉神貺以周旋抽詩書之祕訣兮萃仁  
友以討論遺驪北之粗迹兮遡九河兮崑崙披義塗於  
棘榛兮排私闥以為禮門塞木蘭繼余佩兮危芳洲之  
芷蓀冠切雲之寶弁兮明月懸乎帶鞶衆讒嫉之弗回  
兮猶岌岌乎疇昔之言夫唯被服之魁崔兮衆果蔑然  
而忌之加以險詖之偽名兮乃集羣怒而噬之衆口垂  
涎之澆薄兮張怒目而睚眦怵鬱悵余煩冤兮雖百喙

莫之能解豈不瀝情以陳辭兮荃詆余之善誑競面服  
而背憎兮反撫余言以肆謗聯矰弋之在上兮覆深淵  
而在下仰側身以發機兮俯置足之靡所念余初志之  
好修兮今何以侘傺而遺殃將惟語言以階亂兮無亦  
擇交之不詳世舉好朋而惡異兮余獨蹈其所怪揭吾  
日月以孤行兮宜不招尤於曖昧仗貞信於幽明兮全  
形軀之已多及年歲之未晏兮修初服其謂何襲余芳  
兮鏤余彩坐若忘兮行若待中以為廬兮和以為馬馳

驚於順適之塗兮休息乎曠漠之野衆之不可勝兮險  
不怙乎再試頌吾過以成章兮書爾紳以自識

閔貞賦

明

楊守阯

夫何一佳人兮塊獨處而無侶朝悒悒以至暮兮夕營  
營而達曙言我家良而族茂兮幼連娟以好修珥瑤碧  
而佩寶璐兮戴孔雀之搔頭攬薜荔以充幃兮緝蕙蘭  
而為裯光陸離其繽紛兮芳與澤其雜糅慕關雎之窈  
窕兮冀君子之好逑藉蹇修以為理兮執高門之箕帚

葛蘿附於松栢兮吾懼夫身輕而施厚覽圖史以自鑒  
兮哀哲婦之傾城思雞鳴之賢耦兮恒警戒而相成翳  
靈修之高義兮方采芹於泮池懷青萍與結綠兮俟和  
燭其予知將榮耀以貽寵兮矢偕老以為期何大厲之  
嫉妒兮羌中道而奪之如涉川而無航兮如凌霄而失  
梯豈妾人之殃咎兮抑天命之不可違易珠翹以麻髻  
兮代羅裳以總衰泣既盡而繼以血兮心怛絕而復悲  
天陰陰其欲雨兮景翳翳而將晡燕飛飛而歸梁兮雞

登時而相呼宵燭黯其無光兮撫孤孩於坐隅搏哀苦  
以為枕兮結愁思以為衾依苫席以假寐兮恍若君之  
幸臨下悲喜而欲言兮怛警悟而惕心猶傾耳以馳想  
兮似聞君之聲音終悄悄其闕寂兮哀四壁之蟲吟欲  
夜哭而不可兮淚浪浪而不禁朝進拜於殯帷兮奠桂  
漿與椒醕芬吖涕而不饗兮怏鬱邑余誰語人與歲而  
偕逝兮暑與寒其代序念死生之異制兮卜宅兆而安  
厝薤歌淒其載塗兮柳輦儼以即路雪霏霏其交零兮



冰湫湫其將泣獸挺生而失羣兮孤雌峙於遠樹抱玄  
鑪以臨穴兮欲殺身而為殉憐幼穉之重孤兮又低徊  
而不忍暮反哭於故宮兮氣奄奄其欲盡何昔日之甘  
薺兮今直為此堇荼也哀吾同室之人兮溘先委於山  
隅也倏祥禔之既踰兮人告余以從吉惟夫死為未亡  
人兮吾心喪其猶未畢彼媒妁之嬋媛兮迺申申其煩  
言曰琴與瑟宜更張兮鏡已破而重圓汝何楚居而自  
苦兮終槁死其誰憐曾歎歎其佗際兮媒莫察余之哀

情烈女不更二夫兮在古訓則明明詠柏舟於共姜兮  
悲黃鵠於陶嬰疑妻引斧以斷臂兮梁寡操刀而殘形  
令女蒙被以流血兮荀氏以衣帶而自經吾悲不及古  
之人兮又何能踐夫二庭琰失身於外國兮嗟悲憤其  
何如易安自辱於駟僧兮空嗟咤於桑榆苟大節之一  
虧兮又何取於雕蟲之緒餘吾亦知嫠居之無聊兮忍  
而不能辭也指蒼天以誓心兮雖九死而不移也摩松  
枝以掩涕兮倚修竹而延佇陋余室之翹翹兮閔鬻子

之良苦勉拮据以綢繆兮雖平瘡而莫顧歲習習其若  
頽兮時冉冉其哀暮哀良人之日遠兮渺英靈其何處  
命靈芬以占筮兮召巫陽而問故曰兩美其不終兮孰  
知其英靈之所寓匪修文於地下兮將玉樓成而作賦  
勉陟降以求索兮或庶幾乎一遇假蓬萊之仙輶兮驂  
螭虬而橫騫邀金母使前導兮招麻姑使為御朝發軔  
於扶桑兮夕余至乎湘浦謁重華之二妃兮睇蒼梧之  
抔土事同心而相感兮淚斑斑其如雨道岷峨而弭節

兮文君續其來迎余惡其失節於臨邛兮疾驅駕而不  
停縱余轡於沙漠兮嗤王嫫於青丘爾何嬰於二酋兮  
為中華之遺羞朝騁燕而莫越兮遇浣紗之西施憤尤  
物之喪邦兮誰將戮乎鳴夷周下土而不見兮將乘雲  
而上征封姨先驅以清塵兮嫠女從余以揚靈汴天津  
而導河渚兮見河東之織女隔夫君於一水兮亦脈脈  
而不得語雖嘉會之不常兮永相望於終古步蟾蜍而  
入月兮拜嫦娥於桂下后羿已千載兮猶孤眠而不

嫁惟廣寒之清光兮照萬古之長夜屬纖阿以啟塗兮  
適太微之所居羌中心之憤鬱兮將叩閤而問諸蹠何  
為而壽兮淵何為而夭共姜賢而早寡兮夏姬淫而三  
少莊姜仁而不遇兮嫫母醜而自好惟兩美其必合兮  
胡不與之偕老孰主張乎是兮而施之顛倒死者其何  
之兮乃冥冥而杳杳將乘化以歸盡兮抑輪迴於六道  
何上下而不遇兮增余心之悄悄望閭闔之洞開兮蹇  
欲進而躊躇念下土之臣妾兮敢冒昧而干誅申禮義

金少曰人全言  
卷六  
以抑情兮聊逍遙以自舒回余車以復路兮卒稅駕於  
故廬仰旌閭之赫奕兮輪奐輿飛而凌雲金書奕其焜  
耀兮曰表余貞節之門鵷雛翮其高舉兮隨九霄之鸞  
羣願竭忠以趨勞兮報乾坤之渥恩余雖老死而無憾  
兮將藉手以見吾良人庶無媿於婦道兮光彤史於千  
春

居閔賦

明  
夏  
鏞

居邑邑以無故兮莫時命之大乖抑所遭之不猶兮記

前聞以興懷二八生而選虞兮傅巖築而登台偉姬旦  
其何人兮下白屋之微才孔曰鮑叔其賢兮實導桓以  
相賊矧常何之備武兮忘驟薦乎家客悲此義之不紊  
兮胡天經之與地則苟青紫之既登兮班濟濟而忘刻  
羣奉已以上下兮謂元元其疇依惟余心之不然兮廁  
孤憤於羣嘻宜肉食之為鄙兮曾布衣之有知感鄧生  
以杖策兮叫帝閭而謂之嗟此願之不遂兮恒日夜之  
怫怫忽掩卷以長歎兮將投筆而趨耕聊徙倚以登眺

兮薄遐想於青冥悵天道之幽玄兮考古人之攸行甯  
予伏而商歌兮三閭放而楚聲其一舉以該輔兮一從  
彭咸之故也豈繫其劣而湓兮固興亡之數也苟此理  
其或然兮吾將蕩而不慕也樂得此以卒歲兮茲未久  
其又寤也昔尼父之年老兮有歸與之數音彼賈生之  
不羈兮終泣涕而隕身非夫人之好勞兮固懷鬱鬱其  
難任眇余身之不量兮志瀕涸其無琅奏黃鍾於瓦釜  
兮冀堯舜於君民抗危辭以激烈兮忘此身之賤貧譬



負山之蚊蚋兮為昭代之杞人衆與我而不和兮婉相  
告其猶疑競貪婪以交征兮謂清士之非宜紛婁婁以  
干寵兮謂靜女為弗奇毀方為賢兮緘默為忠揭囊為  
利兮被服為榮居上為顯兮位超為通圖惟其始兮不  
慮其終謂天蓋高兮后土矇矇陰隲為誑兮殃慶害從  
諄曰野響合節兮大音不諧憮人得路兮正己無階吁  
嗟然兮吾將與達人以忘懷

懲咎賦

唐  
柳宗元

懲咎愆以本始兮孰非余心之所求處卑汙以閱世兮  
固前志之為尤始余學而觀古今怪今昔之異謀惟聰  
明為可考兮追駿步而遐遊潔誠之既信直兮仁友藹  
而萃之日施陳以繫縻兮邀堯舜以之為師上睢盱而  
混茫兮下駁詭而懷私旁羅列以交貫兮求大中之所  
宜曰道有象兮而無其形推變乘時兮與志相迎不及  
則殆兮過則失貞謹守而中兮與時偕行萬類芸芸兮  
率由以寧剛柔弛張兮出入綸經登能抑枉兮白黑濁

清蹈乎大方兮物莫能嬰奉訐謨以植內兮欣余志之  
有獲再徵信乎策書兮謂炯然而不惑愚者果於自用  
兮惟懼夫誠之不一不顧慮以周圖兮專茲道以為服  
讒妒構而不戒兮猶斷斷於所執哀吾黨之不淑兮遭  
任遇之卒迫勢危疑而多詐兮逢天地之否隔欲圖退  
而保己兮悼乖期乎曩昔欲操術以致忠兮衆呀然而  
互嚇進與退吾無歸兮甘脂潤乎鼎鑊幸皇鑒之明宥  
兮疊郅卬而南適惟罪大而寵厚兮宜夫重仍乎禍譴

既明懼乎天討兮又幽慄乎鬼責惶惶乎夜寤而晝駭  
兮類磨磨之不息凌洞庭之洋洋兮沂湘流之汙汙飄  
風擊以揚波兮舟摧抑而迴遭日霾曠以昧幽兮黝雲  
涌而上屯暮屑宰以淫雨兮聽嗷嗷之哀猿衆鳥萃而  
啾號兮沸洲渚以連山漂遙逐其詎止兮逝莫屬余之  
形魂攢鬻奔以紆委兮束洶涌之崩湍畔尺進而尋退  
兮盪洄汨乎淪連際窮冬而止居兮羈纍焚以縈纏哀  
吾生之孔艱兮循凱風之悲詩罪通天而降酷兮不亟

死而生為逾再歲之寒暑兮猶貿貿而自持將沉淵而  
隕命兮詎蔽罪以塞禍惟滅身而無後兮顧前志猶未  
可進路呀以劃絕兮退伏匿又不果為孤囚以終世兮  
長拘繫而輒軻曩余志之修騫兮今何為此戾也夫豈  
貪食而盜名兮不混同於世也將顯身以直遂兮衆之  
所宜蔽也不擇言以危肆兮固羣禍之際也御長轅之  
無橈兮行九折之戕戕却驚懼以橫江兮汴凌天之騰  
波幸余死之已緩兮完形軀之既多苟餘齒之有憾兮

蹈前烈而不顧死蠻夷固吾所分雖顯寵其焉加配大  
中以為偶分諒天命之謂何

省愆賦

宋唐庚

唐子謫居嶺表既已半載杜門時省愆而慨曰身邪心  
邪孰陷吾於罪乎吾將求之身則身非我有四大所會  
地水火風誰為之宰吾將求之心則心不在內復不在  
外不在中間是將安在晝夜以思寢食皆廢骨為之出  
髮為之改夢有告余曰甚哉子之蔽也罪性本空念念

滅壞反復尋繹祇益咎悔道逢臭腐何足盼睐玩味不  
已適足自穢淨是妄而况垢穀猶無而矧稗譬之身體  
本自安泰或作病想便若嬰瘵識此病之誰受尚何施  
於砭艾譬之手足伸縮無礙忽作縛想舉動輒絀悟此  
縛之無實即無繩而可解方聳聽於妙語失胃中之結  
塊若春動而冰坼若秋至而葉敗回視無始以來幾千  
萬世所作罪業悉消散而崩潰矣宜獨今之所以流落  
顛沛者哉覺而思之曰噫此殆維摩語也攬衣而起正

冠束帶稽首西望作禮而退

省咎賦

明 李夢陽

伊余幼好此騏驥兮服偃蹇以驕驚載銜轡而周流兮  
耿既得此中路余謂秉質曷固兮謂蘭蕙介而過疑援  
鳴鳩使為理兮俾高舉而並馳既埒直而不豫兮又任  
怨而于際固羣吠之難犯兮每陷危而弗懼余豈不知  
蹇蹇者之寡完兮羌堅忍而弗懲驟諫諍以離尤兮莽  
飄風之相仍交不深而易絕兮儻中道而改度媒阻絕



之不通兮馬孰導余以前路放子喟而掩涕兮逐臣去  
而不還紆鬱邑以屈抑兮恐日薄於西山浮洋洋余馬  
極兮濫逶迤而游淫相曹梁之廢墟兮攬長河之緒風  
信孔樂非我願兮望北嶺而歔歔效桃鳥以自珍兮邁  
羅網之不意憐赫夏以桎梏兮雷無雲而晝鳴慙棘扉  
之卑惡兮夜不見月與星吾聞湯文遭紮兮宜其薄修  
之故惟鄙人之不揆兮固宜蒙詬而逢怒步庭階而遙  
望兮宮殿鬱而槩天願陳志之無路兮倚北戶而嬋媛

觀炎焱之煽埃兮地沮洳又蕪穢哭與泣之相聞兮對  
飲食而不能下怨長日而望夜兮夜明闇又若歲蚊蝎  
伺人以唐旁兮鼠登牀而鳴逝怵倏際余隱軫兮哀民  
生之多蠻數惟萬變豈其可槩兮孰泐忍而不貽援往  
聖以為程兮按余志且焉止哉夢忽乎余上征兮魂浮  
游之逖逖過太儀叩天閭兮捫白榆之歷歷進不入以  
遭迴兮退余將覽夫下土馮玄雲以相羊兮洵極樂而  
無所撫辰星以攄慮兮擬雄虹而降觀飲積清之浮涼

兮依北斗而浩歎何民生之錯雜兮紛既有此多難心  
猶豫而內訟兮悔有目之不見寤周覽以增歎兮塊獨  
處此幽域鷗鴉萃而翔舞兮鳳鳥飢而夜食衆輟杳以  
自靖兮焉誰察余之慢慢閔芳華之零落兮秋風至而  
改期颺蕭颺以摧容兮天淫淫又陰雨幽屋破而下淋  
兮牀一夜而十徙恹蘊倫以省故兮冀一見之不可得  
日昧昧以將入兮掩衾裯而太息惜余年之強壯兮常  
坎軻而滯留憐鬢黟之漸變兮恐芳草為之先秋情有

金史卷六  
感而難忘分性有糾而不釋念昔日之周渥分孰堅忍  
而拋擲闐紆壹以怵脅分竊陳詩以自抒懼言弱而道  
阻分恒潛隱而思慮

離譖賦

有序

明  
楊士奇

余讀揭文安公所為幽憂賦為其友辨謗累數百言既  
恐不能白於前又恐不能信於後揭文安公真盛德哉  
今之被謗類是者未聞有一人如文安公者為之辨古  
今相去豈遠邪非其知之者寡歟為賦以解之

離譖毀之橫發兮志沉鬱而弗宣指厥行為淫僻兮余  
憤惋以代言惟弱操其好修兮穆員冠而履方被頽霞  
以為衣兮攬素霓以為裳援古人之高駕兮將馳騁乎  
雲之路宜發軔猶未遙兮遽捐矩而改錯襲仁智以自  
重兮乃承謗而逢尤肆腥膻其酷烈兮又何有乎杜衡  
與江蘼相梧桐之挺特兮鳳凰翽而來止既鄙薄又不  
潔兮謂伯夷之所以紛讒口之嫉妒兮羌惟聽而不味  
也固衆人所一情兮謂夫人亦不異也彼自好猶弗珍

分實諧人乎奚疑曰忠貞不可忱兮何貪婪而又不惑  
言倡一而和百兮明智孰諒其允臧告曾參且殺人兮  
毋猶忪惕而惶惶傷白黑之混一兮竟莫察乎其故旦  
忱忱以旦暮兮夕營營以連曙重曰世夢夢既不顯兮  
又曷冤結而煩情上白曰何皎皎兮庶幾猶鑒乎中誠  
棄發辭其不衷兮揆於余又何有愆言申申以騁媚兮  
終不究而寤稱昔人有明訓兮止謗曰無校曠來日其  
悠速兮庶秒忽兮猶覺

悼時賦 有序

明 王廷相

余謫毫之明年為正德己巳時政愈急抑鬱憤悶卧郡齋者數月乃賦以自釋其辭曰

何余生之弗獲於時兮熙和返而淒其固玄化之有變  
革兮情沉抑而如危蒼梧邈而皇逝兮重華逝以何追  
畢原蕪而鳳隱兮文胡為而在茲繫哲謨將以援世兮  
衆咸難余之施豈弗省同流之為自全兮非素心之所  
期虎九關而嚇衆兮鴟羣嘯而晝翔靈曜習其冥塞兮

兩儀黯黯而不彰巉喬岳以路絕兮江河廣而無梁帝  
遠而不照余之忠誠兮知進退之不余臧諏同心以求  
正節兮曰聖哲之所常年鼎鼎不余貸兮恐清修之不  
揚希鳳鳥為友于兮接文鵠為余侶結薜荔以為紳兮  
帶芳杜與幽芷余恃此以自媚兮奚取容於羣子苟終  
獲此皜皜兮雖沒齡而靡悔彼飭婪而好進兮余犯衆  
忌而獲愆恒申申以忠告兮彼朋訾而不余然嗟時命  
之不可遁兮矧毒夫之秉權在聖智或靡周兮余孱劣



而奚宣強心娛而偷安兮非道軌之所尚覽彭咸之茂  
潔兮紛覲面於俯仰哀日暮而途迫兮胡不高駕而獨  
往苟余蹤之可以適滅兮又何情戀於吾黨涉洪河以  
揚舲兮汎滄海之三洲登崆峒以發軔兮歷五嶽之崇  
丘雲霍霍而蔽虧兮潮嶽嶽而吞舟叢萬嶮之不可越  
兮叫帝閭而無由將東浮於三韓兮南走乎盤瓠之野  
趨疏勒之龍沙兮及華胥於西夏遞重譯而靡通兮雖  
語笑之莫辨俗淫悍而殊中土兮更陰陽之為沴云僻

陋之可居兮要情性之舒展吾生尚不自得兮何九夷  
之為善超三山於鼇極兮棲神洲以為家友羽人以徜徉  
兮接浮丘之靈槎駕玄蚪以遠遊兮折若木之瑤華  
捫三辰而載歌兮凌倒景而迴車固蒙莊有此寓說兮  
實杳茫之無據余豈貪生之常流兮迷異道而誣世諸  
有求而莫獲兮反余聰而大觀余苟不畔於道槩兮行  
窮困而志完矧沉冥為真詮兮終解脫乎憂患要時命  
之可俟兮胡悵悵以長歎亂曰維河滔滔有汎清兮北

谷之窳蠹為陵兮，洛水滔天底平成兮。  
理亂相禪靡常形兮，詹尹著莢蔑以徵兮。  
卓彼高士遺厥榮兮，順命適變聖通明兮。  
殷憂沖沖文伯興兮，履危俟時集爾慶兮。  
委順抱一維士之貞兮。

惜毀賦

明  
盧 枏

太陰為室兮，叢棧昏玄雲黢霽兮。  
殺氣淪蕤翹盱笑兮，鬼啾啾鼯鼠呻吟兮。  
虺蛇蟉蟻蝨鱗鱗兮，被髮鬢精淫  
恍惚兮，軼上蒼聖澤霈兮。  
澧澧周道砥兮，有平狡童兮。

輕佻馳陂陀兮逍遙俚兮趨志驕蹇越荒唐兮華澳恣  
恣頽頑兮棄鴟鸞奇鵬鴒鴒兮從嬉攀網罟繞被兮矰  
機綸捆徽纆窘觸兮殷懣結軫禍延考妣兮童穉離隕  
室家丘墟兮第霍伐隱冥身園牆兮玄夜長虹霓為孽  
兮日無光痛哭旻旻兮結悃招帝閭兮眇沫般自列兮  
莫聞痛際天兮我柏往者逝兮匪追淑將來兮安宅檻  
虎豹兮熊羆文威絕兮孰所為憲皇網兮冤頸反舊鄉  
兮何期山龍從兮綠桂枝禽獸號兮援狢啼羈縻兮離

憂羌長苦兮物類我思

內咎賦

有序

明  
許應亨

嘉靖己亥七月之閏余從兄至京師道齊魯之墟中夜  
無寐徬徨起坐悼往過之寢深懼將來之易溺怛怛中  
熱撫几赧顏而作是辭

余往眎此竒徑兮願中道而背馳極曠遊之快心兮決  
轡御而不羈白日既下西麓兮竊獨處此縈崎魍魎蔽  
於大澤兮山鬼迎將以噬石巉巉以躡足兮水淅淅以

披靡彼哲人立於高岡兮褰予裳戒以勿濟虎疑疑以  
肆翼兮將以食子之肝肺余方憤而莫知兮神怳怳以  
心醉忠言逆余之耳兮反迎之以罵詈披疾藜以為衣  
兮又紉之以為裳席荆棘以自娛兮雜蕪茨以佩囊狐  
九首而襲璫兮蛇蜿蜒以引吭涉流離而弗顧兮道崕  
峨以徜徉心搖搖而不寧兮體靡靡以皆傷妻子泣以  
向余兮朋友招我以簡書此地不可以久處兮曷返子  
之故居子烈祖之南徙兮固以振茲令圖洎乃考之仁

厚兮遵繩墨而不踰伯追躅於古哲兮既為世之大儒  
子獨何其不肖兮自喪子之嘉模夫人孰能無過兮貴  
速改之惟謹昔殷王之齊聖兮曰不吝以為訓顏氏既  
以不貳兮後世稱其亞聖苟朝作而暮改兮亦云天之  
明命幸受恥過而作非兮墜洪業以隕軀有渾敦之長  
傲兮聖人投之以四夷惡無纖而弗滅兮微罔積而不  
虞鬼神福善而禍淫兮天培哉而殛愚余雖聞而不繹  
兮猶赧顏而忸怩乃己亥之孟秋兮膏吾車於北衢既

遠迹於塵陌兮遂肆志於詩書緬溽暑之既退兮又申  
之以秋初風蕭瑟以怒號兮氣抑鬱而莫舒月既望於  
西陸兮夜氣清而不渝達中宵而不寐兮獨慘慄而嘻  
吁昔嬰身於湯鑊兮痛百創之在膚譬狂藥之喪心兮  
赴水火而莫辭既號激於南北兮復跳梁於東西自安  
止於汙下兮惟投重之是師齒雖壯而猶弱兮氣方鼓  
而復摧曩幼學之聰慧兮竊自比於瓊瑤慕吾兄之高  
蹈兮將顛顛於青霄胡中道之廢墜兮澤異質以涇淆



使蘭茝雜於糞土兮宜云異夫蓬蒿雖往者之不可諫  
兮懼來者之易清諄曰宴安鴆毒不可親兮蝮首蔓尾  
豈可矜兮君子明哲以保身兮孱士窮欲將戕生兮放  
僻邪侈罔桎桁兮戴仁抱義至公卿兮遷善改過有殷  
之興兮長教遂非桀紂同征兮

左賦


有序

明  
王廷陳

夢澤子不善宦見閔有司黜民乘之坐是拘繫自傷疾  
惡反中乃作左賦辭曰

畫晦宵明川停嶽行隆冬劇燠六月而冰墮毛不揚石  
舉輿升廢聲振韻奮霆無聲羣欣逐臭乃厭蘭芬猜鸞  
駭鳳精稂飴梟仁躋德跂勁孤射堯恬海狎江隘瀆沉  
舳風虎輟嘯土兕而號曠德既收聾司音矣彼之朦朧  
五色分矣駿足則縛蹇服乘矣侏儒引臂上捫星矣醜  
女專憐淑媛不御讎璧惠蠅踏巾首屢適郭捐逵擇潦  
而步賁獲閑勇逞夫勁兮麓兔折趾獵者競兮不根而  
葉季為孟分亂曰彼繳之鳥載拔其翎彼實醢酒謂爾

何醒冠踰其垣導冠以登彼田不治懟鄰之耕



御定歷代賦彙外集卷六